

國朝駢體正宗

國朝駢體正宗卷二

南城曾煥寶谷輯

擬一統志表

胡天游

臣聞惟天爲大聖人所以契其神惟地配天聖人所以絜其度履至尊而制六合者必有權輿宇宙之奇席鴻寶而撫八方者必有囊括乾坤之業其居宅中而天下爲大奏其號至博而域內使同利于是度地經野封山肇州表以圭臬則千里而遠千里而近風陰朝夕之景案然而自平畫以沈榆則營州之東邠州之西華裔崇卑之位叙焉而畢正五服九服名章有稽夏官秋官掌建有物所以揆文教奮武衛慎封守申郊圻昭制王略規示民極國家整一

函夏耆定方隅形地脉者則有白阜而伏羲九部之理于是乎駿興布瑤圖者則命風后而軒轅四監之治于是乎宜兆手寔之施九尺夷吾徒侈其縱橫報德之維四延淮南僅窺夫堂牖

皇帝陛下繼天測靈厚德載物含運元化龐俾堪輿高七制而叙五期式九圍以洞三極寒暑節氣均調八紘鯢鯨彗濤晏靜夏海草木合向而拱附牛馬依律而內首日月之所出入風雨之所往來青羌攢樹之郊丹粟沸水之野莫不薦版環幅同朔共采過神農之表窮桑孰知其幾旬帶昆侖以還提封何較于三萬况乃禹治近掩職方所藏荆梁雍冀繫北斗之一星代趙燕吳占五辰于中國者哉

且夫王者陶天下爲一家必先物士宜而制疆理聖人同
風教于殊俗是以齊文軌而輯車書求諸古先咸授紀載
河圖括地遁甲開山化益所述後世取證而山海有經邱
索所傳昔儒推知皆星土之事且蕭何入關先收秦籍漢
法郡志亦在史館故丞相張禹而使朱貢司空裴秀復注
夏書以至太康元嘉竝飭記牒九域十道多盛注錄或刪
八十四家而畿服作經或摭千七百載而區宇名志典在
冊府備乎省方作用寔宏于義誠要若夫

本朝作志以大一統尤該前史所列而超百家給札寫綈
選員領局久罄油素昉殫汗青剡厚軸之樞括大腹之壯
表其準望循其廣輪上覈分野于躔次之錯下正圻略于

組繡之綰明之以繪畫使井井有條緯之以尺幅如寸寸而度列省十五省各有圖成卷數千卷首有表表傍行而如譜之可案圖環審而如目之朗陳兩戒河山中原肩髀雄州繁縣舊國故都古今草沿郡邑併省名山支山之分出水受水之所邱陵墳衍林衡澤虞高下廣深沙壚堅耗東南滄海窮連百蠻西北空同包擾六翟官櫛遽驛甌脫野廬亭鄣所乘關渡所守銀洞杳絕竹廟叢組賅墟嶠區君井長落都護躡靡戍已屯屬及黠戛斯入貢之道高句驪來往所由精據密拊顯著臚晰王公所以設險國邑所以主名封建所以得失皇霸所以馳驟形勢所以控掣道里所以達通人物所以生出世事所以衰盛畢羅千年登

燭紙上覽之而足明要害究之而足審變更撫之而念武
取文守之甚難顧之而思牢籠彈壓之有道蓋將一憑几
以觀九州信可不下堂而周萬里廓王道于無外表靈威
以有截此

陛下所以觀羣玉而疑神鼎壇陰羽而觴鐘山者也獨愧
臣等才朽學落殊任昉鄭虔之通洽讓李該賈耽之練深
以九壤爲街巷阡陌而初得彷彿庶幾如營新豐別大塊
之面目首尾而定其端倪詎等成于聚米編集校錄凡若
千帙隨表上進不任惶汗者焉

三洞璇華序

胡天游

微乎希哉高上之原也宅妙一於太虛資至道以元化無
極爲谷觀用而強名吹景鏤塵言思而不可至慈御運開
劫度人立空教於混成闢正圖於元始前稽龍漢寥廓無
先上溯赤明洞神可攷三墳寶牒象符闡生氣之精八會
靈書鴻迹肇文章之祖是則扶刀圻掖玉歷轉輪吐彼四
十萬言師乎一十三聖緘之珠匱貯以金房誠上帝之元
觀爲貞人之寶命者也旣而渦水飛形守藏寓化反景虛
堂黃首論鴻濛之奧浮提書客青泥灑篆漆之文函谷而
敷五言藥珠而遺七字篇成妙絜遙光法怛之宮風唱銘
音徧化羅提之國三躋之津盛起太初之道逾洪藻笈琅

科結璘迴曜飛步昇元之術洞靈妙有之經華女晨童典
乎天上青城白水傳落人間乃有丹轉流珠書探隱景芝
餐洞鼻道悟琴心懷龍藥以千年駕虬車而萬路引先生
於庭下爰感青童召處士於山中非無白鹿真卿上解不
俟蘆刀羽客潛形唯資竹杖至復無爲妙道變化多方威
敕朱兵靈飛六甲控游鯁於交騁馭八鳳以翩翹扣獬豸
之霞關把麒麟之電鑰逡巡樹裏驚翻四照之花窈窕壺
中便接九霄之路莫不研瑩至教疑抱元模幽通天地之
情偏得神元之道淵深微妙隱見靈奇紅波自湧長留大
夏之春甲子初開永住禪黎之劫足令善思菩薩託左伯
而歸真魏國神鸞向通明而受記者也僕也爰在弱齡便

懷神契翔心雲路結志霞門尋洞中之靈叟欲問刀圭訪
河上之仙翁冀論門戶婉姸元母來貽五岳之圖曼倩張
星共討十洲之記發願于丹陵之下盟心於奇帛之間勤
搆遺文冥軌與帙法煮石而潛識書倚酒而私窺未得破
觚方當析骨第以真神元冊三洞所傳閤阜茅峰六丁所
守誠多方而難究或比類以非符韋編博士校且不窮元
羽臺即修而未徧不緣撰集安備要精于是露浣薔薇燭
然波律載抽丹筆靜閉元關裂黃絹于郊公檢寫上清之
術分碧牋于許斧詳抄洞房之方約彼衆言都成一部三
師所授金口所宣威儀二千大戒三百內文內記秘籙秘
章八角垂芒五精結炁狀龍蟠而鳳走體雲躍而雷奔該

素女之琴絃極軒黃之圖畫復有璃宮玕殿光碧圖華火
藻六層雲壙九色挺玉根之神嶺舒慶液之祥波三元七
寶冠燦天容繡羽銀泥裙飄蜨蛺蝶林霞素女學唳鶴而吹
簫龍月靈華煉行雲而拊石五百珠吏翺翔大赤之宮四
六瑤仙坐嘯空青之樹洞天小大福地深岑妙藥千名奇
禽百號固已廣搜博採類貫條編總衆枝於真根納萬流
于一壑當復珠巾玉案錦帳珊床十香芬郁而朝薰五華
徘徊而夜繞行疑刻鵠帙似飛龜朱首青目如接曲陽之
流紫度赤斑不俟輸寥之館置之枕中卽登真之隱訣懸
之肘後代鴻烈之仙方皇哉唐哉曠矣遠矣嗟乎駒影方
流日中不再艱鋒易蠹愆浪安平非雌牝之云修詎谷神

而不死方欲絕籥觀德歷藏見神證太寶之杳冥守元珠
之清淨山林隱棘混沌留年生朱雀之金花飛素河之姹
女竝華陽以遺累偕瓊刃以蕭條雖復至理未淵絳名晚
立石髓尙閉琳腴遲逢暫而諷此幽詮緝斯綠蘊神遊元
籥氣御圓珠採環銅于寶樹問磨鏡于靈簫如登霄度之
天似挹彤柔之海詎不委蛻塵躅遺世而獨立者乎

遜國名臣贊序

胡天游

夫天地定位。君臣著焉。典冊述作。紀綱備焉。奇詰倡蹈。模
倣立焉。是故命之以鬼神。奠之以金石。恒岱可揭而遷也。
而纒堅之分無易焉。冰暑可召而更也。而一歸之誠無革
焉。飲其水食其毛。則竭心以戴之。踐其朝被其爵。則殉身
以効之。水楫金礪。胥靡贊其用。袞職夙夜。仲山箴其缺。於
是鷗梟欲鳴。獬豸方牙。唯屏唯翰。及匡及就。忠信既薄。光
岳遂分。人虛承天之精。士辜陟山之操。或有子弄父兵。弟
殺兄臂。僭伯淪鼎。大盜取龜。國代移于崇朝。寶歷貿乎仇
敵。然而辭燕眇樂生之涕。登車鮮徐廣之悲。鵠倚無望乎
存。荆狙椎未彰乎報。臣恨恨者。寧以送故損懷。妍妍者。且

日從新爲貴。審少卿之降。乃遺羞于隴底。無陽源之節。亦何尙乎丹青也。夫雅德之士。恢瑰之才。此以正素取尊。彼以器幹致效。然而貞未誠于日月。義罔列乎辰霜。崑玉不碎。便與瓦礫同科。牛後所存。將非難尸等質。而風雨如晦。翰音不已。惟漢就列。嘉實勿踰。勁草在陸。櫻飄隧以益堅。貞松有心。矯嚴霞而方茂。風飈落落。芳薰逆聞。橫流滔滔。高岸斯固。蓋非天地之洪耀。人倫之偉坊者乎。明氏景興。兆古利建。傳祚再葉。家璽異乘。遜帝凌遲。乃更旬服。嘗試得而論之。昔伯考翦歲。姬發嗣昌。微子釋正。啟孽緝社。君辟胥聖。知人則哲。匕鬯卜吉。究難未然是故。周宋有長世之安。而岐鄆無覬禪之患。太祖以神武應圖。歌謳歸歷。淫

河返樂緯露其祥既焉慨猛士於大風悼監明於幼海計
付託之至重懷授受而未宜度茲大兆勿蒙協孫察非常
于庶封謂雄畧之侔已顧嫌奪嫡之文迫于羣臣之議循
春秋之昭法監蕭氏之召爭由是湯孫入廟梁武下車導
之以宏經戒之以凜馭博招英生樹之良佐慎簡奇彥資
夫大匡豈不以羽翼夙成亶辭漂搖之患肱股壯立終輸
禦侮之績斯一日而保乂冀萬世以無變也今夫以怏怏
之臣加跋扈之氣負缺缺之望包脾睨之私非有漢王來
代之序而冀楚君當璧之兆竊稱殷人相及之文妄要吳
札遞畀之數則雖元子秉圭太丁無恙衛和鄭段方患乎
相尋而子帶闕伯安睹其不作也又況地託乎尊親勢據

平形便抗焚悔之勝心激燒城之赤舌進或轉乎福禍退
或鄰乎死喪愴彭城於哀吟懼湘東之辱請久疾思起者
寧得晏然而已乎徒以曩覺未極際隙莫投唯潰隄之日
須奚忘璧而頃置也少主羣公旦夕圖究儒術若湛經務
則焚顧縛虎而當急思螫虺以必犁昧賜杖之深窺謂組
頸其猶易至於怒讐突角厝火烈燔天街鬪星咸池涸潤
容臺就掩焚鼎卒傾是欲成而却毀之方植而終扣之也
且天下大器也滅國鉅任也智者應時靡聞沾沾索效聖
人開物豈以啍啍立功故患不可不防而防之必奏其理
敵不可不勝而勝之貴扼其數苟悟善而理得雖匹夫有
全功假適數以就乖縱魁豪之成事方夫北鄙未警貞風

無害故有三葉之苞不極七國之發而綴之以德震之以威小雅無廢太阿足斷汲汲直正色寢淮南之謀中宗側躬賓邳飭之貳馭得其道君臣交密雖狙詐未足使而奸雄可褫服也抱蜀不言經營斯固守械告備夜呼罔虞而後有不率者九伐以加之未革面者六師以移之仗至正之名伸無赦之討雖敵在秦項或無以抗而今之管霍可得鋤矣方黃欲速閭於遠謀倡強幹之驟圖援智囊之餘說遂使肝膽變一家冰炭戾同室宣元構禍垂永尋兵王室之亂劇于陳生桓叔之形成夫曲沃且曼胡貽衽非寬博所狎中材守文非驍傑所忌兵豈不足也勢豈不順也地豈不廣也力豈不贍也然我北不暇譬怒雞之搏狸寇燄

既張若餓狼之噬肉北風嗟乎甚勁南山於以忽驚何哉
千戈方動于牆內頗牧則乏于禁中吹噓豆俎之寬文曠
邈經綸之宏要無長算以制之無奇畧以踦之武安既殂
謬趙括之能軍望諸在齊云騎劫而可代是猶救經牽足
伏地吮天霜雪待降而以締綬膺之堂榱欲崩而以荅葦
柱之也至平長淮絕涸黃神嘯吟蟠龍折柱將軹道而俱
焚射鴈朝奔與平陽以其裂荼酷極乎天壤兵威窮于六
門蓋發大難之端者必審夫有以收之而蹈焦原之險者
曾亦勿思其復也故知功不可而卒成業不可而闇爲事
君者尊君以爲尙而豈適于危君任國者安國以爲賢而
寧期于毀國然以陽九丁季天人道乖元二乘災文武運

幣方是時也九縣銷聲三辰隕色踐阼者斬約法之令行道者懼偶語之誅雍齒亟烹勃鞞無赦鮑永爲累馮衍成災罵項且封哭梁就磔斧鑊不虛于廊陛砧砒日飽乎殿庭屋誅肆律百職胥泣于楚囚鈎黨刊章十族且麗乎羸法雖虎豹猶股慄卽荆育以戰領然而君子擔忠大夫蘊義抗辭彌壯舍命不渝收身金馬之外畢命銅駝之下傾宗報主堪族揚灰賢者求仁烈士同日抽豫讓之劍繡衣若殷雄杜伯之魂朱杖斯厲若乃江陵大去鄆望無歸非曰居溫猶聞在狩龍蛇左右饘羹從亡鮑叔將車沙磴衛鼓逸民懷漢蹈海之思存賡緯傷周歌薇之怨切或魏闕而終身毋向或伏臘而先祖不知將臧生樂地下之遊田

橫無笑人之客此亦載籍而未聞生民所朔有也終始之
致不偉爲烈歟且物之所寶惟生而人之所貴唯義生無
不盡之理義有可悅之端瓌瓌者免義以邀生斯生理俱
廢嶽嶽者決生而踐義則義道永存仁人安焉智人利焉
喻夫吹律從風以氣而相感拔茅連茹以類而相求蓋建
帝之世素潔盈朝以通濟之術未優而忠亮之風益習是
故春燔柴於龍藻羹脯飴于鳳九視殉其君若波之委壑
而爵之歸叢也視棄其家若脰之剝毛而足之脫屣也椒
蘭之芳蔽畝而愈滋蜺龍之珠量谷而且溢然則觀水者
必觀其瀾陟遐者必自其邇種枳者固不可以得橘鄂兎
者誠未足以獲熊亦好龍而龍降之市駿而駿赴之矣十

年之計高帝方培於前一日之憂少主遂收于後是以禍
至常酷而道息愈光也向令聽言則哲投會機先嚴齒路
之誅申茅門之令吳淠來朝因留邸第荆英入贖卽奉園
陵羊檻不虞鶴文無刻講幽微于宣室論同異於衢宮於
樂鐘虞委蛇章舄孰非夫人所願而宗罔爲福哉何以顯
鐵誓之奇睹貫虹之壯乎或以爲革政之際旣非異姓少
主泣朝施澤未久情有衆愴憤無其深故披龍鱗者雖罔
憾乎匪躬而駢鐘室者或未全乎篤節慷慨之士有近名
焉號泣之懷有迫累焉且水至柔也搏而躍之則有過顙
之嗟金至堅也火而齊之則有隨型之範而乃齊鸞旣立
陳頊御宸發臨海之喪國昭業之世射鉤無怨坦腹不疑

殷相之墳且封諸葛之孤就錄。宏之以廓度。示之以蕩恩。釋蜀將于方刑。賓晉臣之不屈。徐頓天網。以括兆懷。然則倉葛傾心。袁昂奉表。魯城且下。巢伯皆來。楚之材晉未嘗不可得而用也。代之馬秦未嘗不可得而服也。胡越可得而一也。仇疾可得而附也。此誠馭物之洪綱。擊世之前務乎。今以石不可卷而謂卷者妄焉。白不可涅而謂涅者悖焉。至美者不可醜。而企其易貌鄙焉。至剛者不可柔。而將以繞指謬焉。故夷叔之風。周武不敢屈。王蠋之守。燕昭不能下。遂欲改兩生于孫通。變二龔于子駿。議爲仁之非已。謂遵路以將旋。是則許由謝天下。而舍人方意其盜冠。嘯室憂魯君。而東家且疑夫求牡。吁何陋乎。固知賢否之量。

式殊畛於東西而凡短之衷殆合趨于曩古哉於是稽柱
文覈往牒揚姱芳導鴻烈披清風激嗣葉作頌詩鑄豐碣

貽友人書

胡天游

夫西河沈鐘鼓浮亮于霜響代北逸駒振矯嘶于颺旦感
物者氣氣冥感而徵應觸志者景景覽觸而方激淮南子
云桑葉落長年悲春水碧秋士思揚雄致論于愛日孔父
臨悼于逝川唯彼哲人誠有以也辭別之後挹爾獨邁旣
析良儔實屏興賞振星衣以野飯裊風駟而寒路日月載
昕至於北海面朋曷謝併心蓋寡齊音異耳岱封別目雙
鷄兩肩意困于樓席挾瑟吹竽思倦于繁會稷下蕭條響
聞恢論山川悠遠曷其展眺駕言暇日登乎城隅雉閣浮
瀛鱗豐俯櫺郊鷺駭搏垌牧羣戢井墅奕蕝沙原莽屆颺
唳驚心煙霜楚矚溯征憶于流水繹飛響于曳練佻佻勞

訢終朝不息或指謂予曰此走東牟道也旣負海象雄兼
迅秋標爽遂有仲宣吾土之賦且迸子元神州之嘆故以
壯意蕭疎長謠儻薄若夫王蠋烈士嚴光客星陂浸餘臺
叢荒故閭東瞻卽墨南瞰白狼想囊沙之往軍緬縱牛之
舊壘莫不雲雨驟越宇宙邈廻特澠水湯湯導聞禹貢邇
其鉤帶或有絕流詢彼故老方云濫軌潦集淇翻未極決
滯以今揆曩術有殊施是知陵谷忽爾遷貿唯彼聲華樹
爲不沒太傅所以抱登山之悵征南所以愴沈水之思者
也夫英人奮駕雄才騰柄貴及壯華揚其采烈夫寧羨透
遲平臧丈尙槁馘于夷門伊昔與子流連夙夜並琨逖之
感晤深王貢之標許方謂拂虹蜺掀扶搖升元墟蹴昆岡

矣何圖湛盧不揮鐔于荆賸舞鵠未銜珠于瞽瞍
雲班
早後騫青塗之躍春山抵雀晚振幽宵之焰悞此若邁殷
其有懷攀樹旁皇武帝從而泫然撫髀激昂豫州由是流
涕微我無酒其能已乎願襲重福益滋令名俾臻良時極
發光耀追往者逸其軫貽來者景其躅徘徊百世之下恨
不見我若不見古人乃爲休耳若夫優游下上玩弄朝市
朝房孟弋之豔畫甄蔡門之隊拊缶鳴鳴過淇怨戀人生
行樂置其然矣雖佳俠所游而耿懷斯渺夫豈丈夫之本
趣乎

報友人書

胡天游

予若足下昔扣關東遊傾蓋汶泗交若素識無煩重言臭
洽味歸遂挹羣秀于時揚壯色飛珞談振遙步暢崇觀絳
竹旁羅倡謳亞發縈策未已勝觥無算然後徵博進咒明
瓊召奕秋要井公鈞探元洲之趣射窮庠腹之妙旣而颺
翼翩反陽榆遠移招清吹於霄度弄素照於波下秀果夏
落頤津藩甘朱華夕敷芳寄蕩思相謂是時宇合之內膺
斯歡者凡有幾人凡得幾事俯仰之間適數日耳司署出
入有闢圉之限整飾訓對同牯拘之困雖復散意游蟻側
聽鳴鳥固以愜爾幽緘無宣予懷顧眷良游彌益噫嘆知
佳賞之有屬何曩勝而云再也廨後官種蔬地一區久廢

不治轍芟蒿榛簣致隴阜時用登望此地有魯仲連汲長
孺崔元岳之遺風鍾離釋囚並爾祠廟向非數君子者相
與盤桓且以永日安能少日復居此乎

玉清宮碑

胡天游

原夫發揮帝載之先張闢王猷之始通署調陽爰資乎資
弼司天主土乃寄乎沃心於是雷雨平屯股肱佐難飛揚
壯傑之心慷慨經綸之氣莫不思以動日月思以列箕辰
耀洪伐于鐘旆之前鎮光跡於帶河之表舟壑俄徙風霜
再淪歌舞恒留山川不歇可爲豪矣可爲煒矣然而域中
之畧雖廣參同之思未宏語元趣則眇其鴻毛傲真風且
未當一呷是以通明有契高哲所懷旣崇世載之勤兼蹈
賔遐之步鵬搖天咫舍九萬而寧風鯨徙溟波豈三千而
論解是以歸劉謝漢仙師之松石可尋變姓招吳滄海之
鷗夷何遠亦有果市丹砂一絃成曲金堂水玉千洞飛形

鎬京榮靈宅之名使者聘中山之道若乃理極歸根情殷
濟世朱門黃屋初無往往之心白日青天正復去而奚遠
渺迹外臣參勛有亂者倘更可得而言歟先生邱氏諱處
機字通密登州人也下斗星於曲阜蘭期則世孝旣宣訪
真誥於華陽許邁則陰功且篤稚川珠珮上宿貽祥貞白
金爐天人入夢蘅薇降位張陵開鳴鵠之山嬰敷誕靈元
祿抱函關之氣生宋高宗紹興十八年當金皇統紀號之
八載芝眉月宇方頤綠瞳超斧子之丰神得道君之好相
雖鸞轡未振而霞標已翔髫稚時有善相者見曰神仙宗
伯也若夫羨門跨青驪之岸安期畱赤舄之鄉波明樓堞
如開方丈之圖山對蓬萊卽是青邱之宅岩前採橡石乳

恒逢洞口彈碁瑤姝乍見先生年十九游而樂之于是遣
世因頓塵容卷沛澤之霖才溯幽微之瓊思居方以外寄
迹全真嗣重陽之北宗受東華之大道新篁入聽奏松風
於樓上白石可餐和雲液於巖間雖山邱夙具無煩證道
之功而雌牝猶勤追含谷神之妙既乃右英密告太白靈
貺司馬高赤城之響扶晨標絳籙之名丹文素璧方違徐
市之車玉鉞珠旄先布萌盈之誥道成無上靈洽杳冥扇
元飈於宇宙之間暢瑞號於王公之口斯時也四域鼎分
九州幅裂風埃頓洞坤輿蒼黃璇魁斗柄不度南箕和叔
日輪終睽北陸彼思會獵于吳會此欲刊碣於燕然或懼
長江天塹代馬之隊更飲于佛狸或虞乙酉魚歌五龍之

師並窮于僕谷並以左手爲重得人者昌翹懷先覺之資
請示太平之術先生默識道消知非我用言違車幣獨嘯
雲邁未幾天眷朔方帝唯北顧耀黃星于紫蒙之野起飛
龍於沈墨之鄉元太祖成吉思皇帝雄武肇圖英颺廓社
載開素德寔企貞風希三顧之勤佇同車之載

二語本
元祖詔

虎節授鶴書旌璧殷然裏輪俟駕先生審大兆之已歸念
人羣于可濟倘在功而宏施是已行而逾崇然後隨使輶
經絕域寶車騎出師之道跋履非艱張博望持節之鄉邇
廻且屆雪磧夜逸熱坂朝傾山臨檀特異法顯之求經水
涉流沙似伯陽之去國遂見元帝于武帳焉天酒旣傾雲
帡始設虛漢文之席側對賈生陳齊國之燎下顏東野坐

而論道禮重三公咨而稱師師敬隆太傅視夫聘道士于華
井之旁召轅軒於朱明之戶威儀絕等固不同年而語矣
然後告以清淨之理語以無爲之道述衛生之經則云寡
欲陋長年之藥唯曰保躬其義正其猷遠詎似齊東五利
煽事機祥海上盧生恣其誕惑冠謙之重臺之上魏后遙
祠李少君穀導之方漢皇親受者乎唯時太祖志炫極威
方謀窮併滅國五十旣異周武之東征絕塞九千未厭莎
車之西畧或藁嘗歸之首或盡俞林之族海荒蒲類曉絕
夷歌山繞焉支宵聞痛哭先生以爲天道好生帝王去殺
必信老氏三寶當以慈愛爲先太祖敬納焉曰天遣仙師
以悟朕志願命左史書之于冊爾乃賜宗師之大爵呼神

仙而不名比博陸之高勛崇張星之歲德誠異數也太祖
軍儲或缺環衛是資先生偶假煉金濟其時乏暫方王貢
咸驚大術之奇衡以蕭規且茂關中之績又亡金而後民
人俘纍先生哀之招免奴掠爲良者以萬千計方令江陵
士庶歡辭黑獬之營鄴下衣冠終免季龍之暴其匡善者
宏矣其被物者遠矣俄而水徙雷驚山摧岸蹶動隕星于
處士徵圻石於文公桓法闔之白鶴方來陶安君之赤龍
且至時乎脫屣且就羽化焉元太祖二十二載歲丁亥則
宋理宗寶慶三年時也務光躒景殷丁空虛左之求木正
排煙姬后愴升堂之拜詔於大都立長春宮奉焉自是而
來被教逾廣終南棲遁之地卽做樓居棲霞桑梓之鄉先

開月館濰縣城北玉清宮者蓋亦奉靈像之所也若乃城
留黃歇卽表荆祠夢入周公猶希魯殿羽客經行之地寔
起丹堂聲聞乞食之鄉非無寶刹况以壤隣阡穀境接粉
榆仰雲輶於倒影劉根則遺躅未遙溯芳跡于他年長史
則舊壇斯在御史中郎尙集同舟之侶祁連公主還畱訪
道之詞創自初元闕乎三代市朝遞改塵劫再遷甲館飛
廉奄然搖落竹宮羅薦幾見疏蕪芝田周風雨之英桂樹
歇山可之秀縉紳父老等零歌暘雨蠻蜡時年驚蕙帶之
傷秋感雲旂于斷曉綴珠露於瓊裾之側寢閨扉于綺甃
之間爰究經營規乎更始于是從如雨之羣命成風之技
徵梓材於徠甫討青蘧於巴功龍首軒駢輦題矯天三危

官窈八景鏗鉦春窻則青鳥交窺雕檻則班虬並簇花迎
鳳舞照畫壁而俱迴鳥學鸞歌度林芳而不下靈芝煥炫
迷茫法寶之游璇閭森華駭耀徐宣之矚靈氛雜沓仙會
容與羽蓋兮霄幕左啼猿兮右鳴鶴浮邱兮甯公來隨煙
兮去乘風四度者睢澤之鐘萬吹者法嬰之曲穆穆乎肅
肅乎蓋可得而瞻不可得而狎也昔者庖犧作御宛華降
方野而授河圖炎皇應期大庭下濟陰而敷太乙公孫親
大傀之訪文命著雲華之拜是知皇王秉錄愛資邁世之
師大道拯時必啟蒼生之佑若乃乘震威而揭訓道天命
以敷誠不嗜殺人之言寔唯至教之本是則山中宰相功
崇宣室之前衣白尚書道冠雲臺之上視夫錫子傳湯先

明恭愛真行導夏惟述儉勤理貫一揆風斯共劭與僕也
乾坤抱策江海浮舟仰止高真服膺寤寐馬文淵翺游頃
日壯志雖橫李鄴侯餐吸煙泉幽思且揭延望青牛之跡
徘徊碧雞之祠仙公杵臼空爾殊聞羽士塵沙翻希再見
因茲郡會須予制文爰叙瑀徽載揚靈德配廣野萇生之
碣異淮甸八公之碑褚先生金庭翠刻十倍寧論陶都水
地肺貞珉千秋倘合銘曰

靈寶出法天元轉輪無名者道立極惟真或隱或顯繼世
繼人漢妙金泐唐精劍神東華協歷北海騰鯢骨錄奇鶴
襟標緯雲方流素壁寔抱貞筠定疑散想藏密會真宏契
天隱隆跡帝賓資用軌裏標障宙聞交暉五老冥德三元

試通十二年窮甲申霞池鳳鼓月嶠麟蹲來看塚雪去畫
城門劫殘青帝風偃毘嵐石室更祕咸池謝春光齊炫紫
瑞榜鏤銀闕臨元水幔引長林沙平聚玉霧暗霏金琦葉
雕字玕花粲文屏心雀翦鐘乳龍眠丹碑發井素詠留陰
虹銷曲遠風遞香尋雨隨少女石似佳人地迴緱嶠水卽
虞淵青天白鵠永望茅君

有道先生安頤蔣君碑

胡天游

夫恢恢元德非方器而云擬落落風飈詎泥塗而可汨士
有抱芬芷懷琬玉遇日月動江海穆天綽揚王庭或者無
名以鎮樸深藏之若虛越谷播芳蘭性寧其殞貴圻璞銜
寶玉德豈焉抑貞故有履節介石篤詠衡下幽人係其吉
逸民徽其度矯鳳歌於丹壑之上輝元珠于邃穴之裏擊
而愈芳挹而愈光者其惟蔣先生之謂與先生諱嶠字子
巖本括蒼青田人也先代當元文宗時有仕越者因卽山
陰宅焉高祖某明宣皇帝聘賢良位河東憲使曾祖某孝
廉仕終縣令祖某孝廉父某郡文學先生秉元和之淑氣
含恭溫之令度性明水以其朗體凝岳以斯鎮少則慧邁

長擅宏通蔡邕見而方驚郭泰交而彌嘆年十七舉秀才
校學使者滇陽許彥覽其文召進謂曰逸常之器也達則
爲珪爲璋令聞令望不然鴻其飛乎蝸其游乎其曠世而
獨清者乎由是芳稱愈流嘉貽載遠咸寫崔實之作爭束
王符之帶文會者贈綳而請歡才難者遺書而問道先生
恬然不爲假也明烈皇帝之末年兎舞周京蛇垂漢殿煖
殘域化鼎震龍飛斗分吹熒惑之鉉地軸列蚩尤之戰旣
而虞泉日薄霄路烏號金莖琪樹還歸犀角之營白馬青
絲更殘牛頭之闕斯時也永嘉流寓京洛冠裳或摧夏馥
之形容或託杜根之傭保藺中漁父岸朔桃花竹裏徵君
歌傳栢葉先生固已有騫然之志矣屬以承侍二親未卽

遐契周旋人間又十餘載頃焉銜索再毀彈琴成曲遂誓
先墓絕吏車或有勸就仕進者喟然曰通塞命也用否時
也獨善求志斯固可矣且唐咨四岳許由逍遙乎沛澤齊
設九賓少稷高枕於陋巷知幾其神吾誰與乎於是練味
元澹研幾寥廓絜發天山之兆跡希夷惠之間殫思六籍
暢決微旨若乃虞翻受命固以知經言偃握文方富論學
以爲聖哲之道式備垂典宏闡之烈唯傳在人然後舉束
脩之訓倣待扣之教辨諸儒之異同折羣言之淆正僭僭
焉觥觥焉方令淹中學士並念張文蜀國儒童咸過孔氏
劉瓛檀橋之館恍帶清溪仲淹汾曲之堂翻迴疏屬地成
虎觀山入鷄籠絃被春風歌搖素月或獎弭生于瘠土之

產或成季寶于牛衣之砌裁章礪壁者未可得而稱也俄而貞期益劭純業愈臻公孫逾射策之年揚雲逮擬經之歲然後同袁良而扶藥問龐公以對宇若夫宗炳舊宅羅含故階蘭菊恒滋煙霏且結檐波鏡接窓原綺嶺紺崖黛激頰壁霞纂蔓谷牙岑傾巒岫靈嶺合沓如通勾曲之門雲術幽修似俯媧宮之榭峯回偃蓋實抱貞松岸別離亭翻榮濯柳將軍青竹之田猗于淇澳仙人叢桂之曲芳擅賁禺秋芝兮別房春蕙兮交帶仙麝擾雪來祥辛繕之家靈禽下風或是雷公之吏况以顧歡白石曩迹遙鄰梅福青山遺堂近接談易之處卽號明泉頽硯之餘因成績水于以樂仁知于以寄徜徉流連山澤之交舞詠雲霞之

契旣家世清貧又耻營資業龍洲橘藉苞讓千封蠶月桑
田陰移十畝范丹魚釜幾欲騰歌閔叔豬肝何因入市賓
戚富人時致盛餽數謝不獲風操愈堅張穆之布方來蜀
道羅冲之馬先辭卜臺卽逢蔡度自憚解襦終笑胡奴寧
煩送米鳴琴在室屢空晏如壇士之視曠然蘊邱之願斯
鄙養志者忘身爲道者日損此其謂與春秋愈隆神明獨
茂值

天子養耆年優粟帛深衣錦帶靈壽縠皮扶輦諸孫間造
鄉社望者咸謂之神仙焉已而巢鷺徵凶著蠶告咎指期
啟足泊焉就化以康熙丙申歲卒受齡九十有四嗟動遠
邇空奔里巷諸公學士聚相議曰惟先生抗九二之潛德

乘元文之裕縵宏度雍損駕懿黔婁必有美稱比休明夷
白之號表史雲貞節之素諡曰安頤先生禮也先生性淳
簡尤篤孝友雖在妻子不窺怠容又口未嘗臧否純孚蒸
洽化行鄉閭李仲元居西蜀管幼安在遼東無以過也嘗
以明史未就有意著述將顯功德于二祖昭王制于勝代
光宣室之丹青香騷人之蘅茝采善鉅醜立爲世則朱方
隱者筆錄成帷東觀逸文流談若海討論歷年義例甫就
學館不戒卒毀于火束生十志無復略存謝監百篇並從
煬沒雖懷兼麗之作終墮三長之業今其在者目錄數帙
文集二三卷而已旣少好學老而彌篤言如監史臨敬衛
侯更陋曹公唯稱伯業乘陰負日未忘取書矐子晶然轉

更綠色誠冲異之宏詰夷逸之遐規者也門人孝廉茅君
等或受宏成之石或啟鄭生之夢或近林宗之德行或接
田何之講論並已鬣封元塚鼎刻陞山下馬成陵巢禽列
樹經鄭泉而布醅愴醉石于亡琴堂流荆些翱翔延叔之
靈山繡秦潼駿走阡君之祠若乃朱公重器載勒清文太
傅貞珉寧虛穆頌不有所作其何述焉于是導元醴以宏
灑播景颺而流扇唱瓊潔之曼武亮淵居之闕光振泰養
于槃詠騰遙懿兮洪芳其詞曰

民之初生載一抱懷適斯止矣衢嬉隴寤始雜元黃方刊
質故滋和滑甘焜離攘素射性華招蹙靈機步易怡膏鑠
爭成桂蠹委濁何返初達何阻孰謁皇年孰恢淳宇嗟伊

夫子淵哉自我漫漫鴻文優優天府令儀令則爲簋爲簠
井厥虹抽滄暉月吐師鳳覽曦朝桐萋乳踰櫟負棟漂舟
接瓠在用金貴不提石忤炳代雄邁出機默語撼頓衝薺
滅沒鏡魖輦穀辭藎豚茆別俎文卦敗坤高爻動蠱悔亡
賁白貞亨素履紛綸學圃從橫義弩美鑒堯眉丹隨孔武
席珍待問聚沙而雨霧市園橋星言擊鼓樂談五色禮司
于矩身植綴裘口標脂戶欺魄真疑揮賓德杜節以雌安
仗微元柱羅角斯避寇陰不侮穗歌冬索零謳春紵山草
名人葭蓬作堵宅依柳下園通菜圃菊水香杯槐林碧廡
渙成廉讓人欣鄒魯空晝宋緘還疑嘯父望罍有息委和
知旅季梁醫謁隨梧夢榻嚴封積卷雲低偃斧房摧辛杜

庭迷霧雨歲月幾何川原自應遙瞻宿草更聞相杵佩履
恒存琴壺列胥虛堂罷盥閒楹奠黍夜澗琤珣秋峰豁戶
花牖風香蘿壁月嫵蟬疎露嘒禽簇煙語嵐碧自幌樾翠
空組宛宛靈修幽幽令緒德餘斧藻文垂黻黼帝璞完製
神龜善所鶴返天長鐘沈日午揭頌瑞室頤型碩果德里
鄭公賢亭徐孺陵谷何年明徽永序

趙開府碑

胡天游

大將一星主之者太白河圖九陣總之者元武蓋有山岳
精舍風雲氣凝志陵山西豪冠隴右晉鄭之頭畢白莫邪
無爭其鋒胡代之羣不驕騏驎獨奮其臆桓桓穢穢洸洸
言言漢武謂國之爪牙世祖曰朕之禦侮誰或得之則都
督趙公宜有述焉公諱某西涼人也家守儒緒壯尙武略
甘蠅更羸之射曾從蒯瞞之劍中黃五音之術滋泉翟鳥
之秘莫不成誦在口從習得師龍鳥翔于握中風雲屯於
帳底淮南奇材三百勾越君子六千一人當之彼未云衆
有碩福之魁狀無不侯之奇數闊達慕郭汾陽乃從武韜
之選勁毅等張萬福遂登翹關之科明策殿庭擢美鉅甲

若夫列宿垂象羽林所以備非常周廬衛環勾陳所以奉
太乙公豹冠錦衣緋紕繡襦居則耶將騎都行則干牛虎
士挽繲稍夾俾倪從甘泉經回中獵陳倉絕輪隧率奔戎
七萃之士嚴太常九旂之伍承侍華蓋畢罕之下往來雞
翹雀眊之側果銳軒特英眊彩發負牙旂玉帳之望固已
久矣出自禁近授游擊將軍宣府永寧都司旂鼓佐中軍
戈戟耀絕塞荒漠積雪孤城界天穹帳毳落氍毹水牧以
時驛至族布關下撫之彈之桔槔火平甌脫無事屬
王師西討荒落元舅大將軍八都統駐師境上泊車甲士
械其大帥委備於公不鞭一貫三而終旬以畢上言請自
率一隊鏖戰臯蘭間鼓少卿敢死之奇奮舞陽橫行之氣

廷論以方守要陞壯而弗許甲戌遷參戎閩陬領臺灣南路島郡卉服孤懸海中波浪迷沒蚺涎鰐腥夷獠雜桀弛則易蠹嚴亦召爨公因剛因柔制其俗性惠不窮惠威不罄威得其理宜樓船靖焉已卯再遷辰沅路副總兵官越六年建大將庠纛開府于高涼南越武王之餘壤石龍夫人之舊風崩嶺糾互阻究深毒硎賊梟戶箝弩利銑乘間則狙聚出劫捕討則峰散虬匿乃方畧旣設而居人夜寧又以爲縵胡之徒衽革之士性託于弦刃習成于彊凌夫必令其知方然可使之有勇于是開講肆于馬隊投壺矢於軍中給其廩粟親爲指說然後狄魑罷擲者始知有孝經論語書與尊君親上之義旋以服去官起鎮嶺海裨弁

偏校及荷及莖芻者先聞指揮皆戢束自振至之日幕下
肅然海濱黯兇或思狂嘯公察先狐鳴早沃螢火懸渠首
于轅門焚名書而不治在鎮七載時當懸車遂乞致仕庚
戌之歲仲春之朔數齒八十循化大歸公慷慨明略本平
心懷服官五十年由期門散騎至都督統三軍位一品而
功尤著于辰州方爲副將時值蠻獠亂大司馬某受賑帥
禁卒會黔楚廣右三督府征之箠箐黑合炎氛癘蒸鳥道
絕于烏攏鬼門危于人鮓機雨礮石闕驅象犀進者徧殤
拒不可拔公身當前茅掩躋險壁奪天星之砦破龍蛟之
洞大師克入馘其雄酋環耳鳥言之種土船竹節之裔咸
稽顙割面乞其餘生以是見遇

國家洊用崇大前後被

賜良金之甲良材之弓文貂之裘文綺之服

恩渥屬繹以爲昭榮某年月日孤子某等筮葬梁山之原
舉駿行之所崇序景烈而揚煥旣美刊魯之鹿將示生金
之碑夫據鞍投筆終始于功名緩帶輕裘從容于詩禮鼓
鼙聽而可寄風飈聞而足矜是贊嘉名爰書神表馨其華
寵用紹前式銘曰

趙世名將雄于馬服壯侯如山永昌威蜀人武空桐風高
代北羆彪遂騰佇居笠轂鬼方西南縈瓠遺族蒙蒙未視
羣吠相嗾頓戔星翻援旗電蹴銳我前鋒剔其虺蝮庚鈴
鏘鏘鎮扞南隩雅歌圍棋射場蹋鞠麒麟之袍白獸之玉

矢則盧矢錫戈於頊賁以

雲章爲彼勛錄啟我家光慶乃天福平原阡阡邱如高屋
樂茂松寒岡廻川伏惟瞻者龜澤珉隆告有辭中存更世
畱矚

禹陵銘

胡天游

馮翼無疆之爲大變化不測之爲神惟神也故能通天下之志惟大也故能成天下之務若夫參鈞冶贊幽明開物以冒乎道裁成以佐佑民撥根荂而得英華挹三五以借步驟古夏后氏有皇極之建焉昔者秘電流樞紫氣表壽邱之帝瑤虹撼月清明誕若水之君承家連聖不俟千年紹體徵奇昭于奕葉蓋自白馬庸唐元魚列伯石紐育雞丸之瑞金精耀龍象之祥所以繼天測靈柄真撫類登固太極挺桐萬萌若夫虎鼻鳥喙殊其度駢齒參漏異其質戴鉤鈴之威懷璣衡之道應古靈而稱帝履文祥而錫名是聖人之天授不違者其德可親者其仁右矩以左規聲

律以身度儉勤既克滿假寔融于焉幹蠱告忠崇郊復孝
是聖人之元哲古者二靈陳樞五德未正爰自陰康烈山
之世嬪有濫洪震汨之災其工更薄于窮桑赤縣將鄰于
細柳陰行始乎淵獻當九六而數窮水府逆乎填星雖勛
華而易救匏瓜不固其石將復廢極而沈州赤帝徒司其
方無以發英而生寶夫乃蒯何擔爵躬橐輿庸象三能以
奠川任中官而敷土抑下鴻于八載填沈菑于九刈袒媛
白水之上睹其憂勞奇子紺谷之中笑其毛髮逮乎黃經
按歷蒼使告期龍門既開呂梁無阨四陳宅九州同作又
于萬方施功于三代相柳絕歇羣帝藉以有臺支祈不伸
太疆斯焉凝竭沐日浴月爛此光華鴻沼玉淵返其沈戾

是聖人之神功由是度東西之高下正南北之廣輪相原
隔而作畛畦任腴勝而彫殫瘡土交風而不雜民鼓舞以
咸宜六府修九功叙司馬得導其三農司徒得敷其五教
是聖人之經緯絕地通天而後民人不糅于重黎賊行亂
德之餘精禔或孽于妖孽向非亶靈之有作何以被裁而
備民夫乃驅龍馭于翠岑駕鼉梁于紫渤經日月之外迷
風雨之鄉範形山海之圖象物陰陽之鼎青烏白澤掩軒
后之載書十日九嬰邁丹陵之命射是以禍暴弭神奸窮
無害無虞不逢不若岳棟檢元都之印江河奉金篆之封
知幽明故爲山川主是聖人之贊化邦貢旣作夷琛自來
利用尙象而器數立包錫茅入而綱紀尊丹銅鑲翟金絲

競奏于方州貝璵珠間龜玉環登于海服何天龍而受其
盛王會而來享是聖人之制典于是元龜協吉擇馬銜貺
洞庭會黑風之紀河壇飛綠錯之文雲龍信躍而遷虞鐘
管革調而啟夏然且吳於大費讓在臬陶以至鶉居有斟
雉之風而女醪輟御粉藻有徽琴之樂而尺璧是輕方復
遜德于二皇納勛于元昊是聖人之撝挹百事考于廷臚
言采于市式隨耕偶俯佇岩阿四海載道者迎握沐而俱
來五器聲門者俟投食而併動晉侯之體咸燭魏闕之羅
不驚是聖人之廣運把瑞令于元宮築刑塘于鐘阜曹魏
之猾斯剪屈驚之消乃平萬國震疊而言歸九流承鏡而
服化是聖人之神武用以鈐天揆地正歷辨風山歎徵仁

燕衣響禮輶車六維綏旆九旂三幣操五罰定好緣而惡
駟尙信而貴忠是聖人之宏憲夫其勝術簡乎帝衷敬德
稽乎天若纘纘錄而振黃圖行堯道而脩舜緒有君民之
大德有事主之小心膠漆無約寡怨而物親愉易昭風未
施而民化故以侈城郭焚甲兵天下無鬪百姓仁遂天休
效地祺集亥旣呈珠渠搜視服跣踦弱水逐飛兔而俱來
玉女琅風挾祝融而並降扶登驗律金山漆樹之鄉昭明
測辰夸夫壘民之域其顯令也如此其光被也如彼豈直
燧巢荒畧太平惟吁倨之風姬子謨猷苞歷隘干戈之命
皇風穆矣明德遠矣是以化訓九原颺功于虞帝執中三
善無間于素王宇宙嘉懋其平成健順允安平翕闢故曰

禹者備也備以續洪業夏者樂也樂其駢三聖業殊茂故
埒文祖而稱神聖以至故如重華而號大公子觀之而不
窮大夫歎之而已淺是知入域未優乃陋儒之琦辯衰德
傳子乃標末之口噀歷陽贖幣豈勞于玉燭之年蒼梧縛
人寧泣于醴泉之載乎至人達化原始要終二龍東浮甲
馴爲畜九山南望苑宛何多視此會計用藏弓劍拂驂霞
景聊從鼎湖之游脫屣車書遂罷塗山之會殊雲陽之博
葬異渤海之高營范林不列于九嬪絞葛無煩于四衛臺
連虞狩九面之陵遠廻洞接朱明千里之雲自起下周廬
于太乙隨播風于帝江作廟奕奕乃刻桷而丹楹奉璋峩
峩儼受珪于碧月木客大家猶庇曾孫之墳百蟲將軍言

侑呂臣之祀雖復貿遷朝市縣邈山河茶陵天子墓氣方
沈衡岳炎皇冢圖永閉貞珉長揭惟餘安息之封靈汲遂
湮終似瀨鄉之蹇然而其魚旣免乃粒殷歌是則秦皇肅
灌仰此明仁漢后遙祠感乎至德稟神服教百年畏軒帝
之靈樹岳流江終古麗盤皇之宇銘曰

太極旣成乾坤乃行洪荒混茫徑榛杳冥聯珠繼聖比葉
書靈亭形毒氣剏物導名其功則融其施則遠理剏數蠱
元屯黃蹇載啟大通經綸天險兼德堯俊籠光墳典神珠
受氏崑石開祥疊疊穆穆爲紀爲綱吳刀羽野焱輪月傍
雨沐風纒標趨楯行智以神行道由利故括象通原崑崙
察扈心罔弗辰冠挂不顧析形八區哀歌三過雲華訪道

春皇授策龜印泥青河精字黑肅兵天老擁川五伯熊化
輶轅牛分峽石流沙西寫漏陸東捷赤淵分穴咸池匿天
三叢壺粟九點齊煙山明海靜星黃喬鮮範疇協昊元圭
錫帝食溢艱奏壤綿擊地暨朔敷南東漸西被帝軒承世
賓均裸祭唐日更就嫫風再熏二武慚紹五稱比聞朽索
馭馬關石和鈞玉帛輯瑞裡柴合神郊引青瑯庭虛元武
大越山靡九夷路阻始從宛委復于覆釜襲乃衣裳遏焉
鐔鼓北瞻穀林南通紀市鬱鬱相望參參互起日月流天
江河行地神之獲哉靈其皇矣幽宮拂漢虛陵隱岡鳥耘
晚陞烏會朝析松如舊社梅非故梁劒沈山而斗落鐘出
隴而螭翔涸岷山之扇水泯安都之石房惟懷德兮日新

與溥利兮流長千春兮萬古瑤瑱兮椒漿

越王崢歐兜尊者道場銘

胡天游

粵若天犧渡漢元樞運軸之初遁甲開山大禹承珪之朔
尾閭南北巨壑以交波蒲壁春秋文身而其穴五百艘之
竹箭未上秦涇三千界之銀光但搖周殿詎復梵陀縣湧
寶香開微妙之樓優曇逆蕤金粟敞清涼之地五明盛士
於此敷衣十地應真言來置鉢越州越王崢者蓋勾踐保
拒之遺也自昔履亡橋李則怨切魚門井溢夫椒則形危
獸角五千甲楯先窮會稽之棲二萬習流未極姑胥之歛
殺龍虵而祀川岳刑牛馬而祭昆吾星漢虹蜺河梁雨雪
玉門之策旣戢紫宮之運屢遷熊羆卧壘斷絕烽煙虵鳥
環陣淒迷陣氣乃有阿育神王華首尊者東揚行化震且

流慈兼十香象力以宏風現一梅陀身而說法入屠羊之肆卽是梵天役辟蚺之靈便開蘭若斯地也孤雲一握則峻盡岐陽赤木七盤則危傾輓道銀猿絕壁斜俯輕雷朱鳥春窻旁懸列宿秦皇風雨望羅刹之鞭驅海若波濤驗蓮萊之上下雲圍寶堞參差飛瑪瑙之光林鎖紺堂高下鬱多羅之色乃若安居上刹岩護雷音清淨涅槃河凋香樹則金山不壞瑞相常存恒勝舍利貯八金之壘無事羅綿殉難支之塔四天回向三界皈依蓋夫久也所從來矣至如願力長存神通希有廬山扁竹於此復聞吳女殘魚方斯非儷泉隨杖扣無煩疏勤之刀井應潮來便等楊枝之咒熾然大寶縮以不虛者堯仙人戲而難攝可爲邈矣

獨宏哉然無際者也是使文殊童子拜問三摩末利夫人
所參七會聚龍華而滿願捨象寶以咸歸互炳心燈恒銷
意葉茲堂宏敞覺岸遙登轉法輪于微塵悲露漚於彈指
何年電火兩兵已散於空花今日雪山遺鏃更生乎藥草
修羅見池之水合功德而成流提桓胃樹之林挂珠璣而
不落銘曰

大道元接真人盛宏如斯鹿主譬彼醫工戲化渺迹誘攝
何踪無相有相非空卽空騰猿落箭駭象摧鋒圓如定鏡
徧似風猗地平怨壘山啟祥峰巒浮晚碧花笑春紅瑤枝
桂殿紺葭蓮宮玉露甘葉金蜂吹叢無兵洗雨有鐸吟風
營沈萬馬天環八龍利翔銀鵠幡舞珠虹雪傾崖瀑雲屯

石塘月窺蘿沼煙結霜松神山遙望遊臺幾終靈英何處
還來故雄

爲如皋公與僚屬祭鎮海吳將軍文 胡天游

若夫募收怒而招搖指天奎所以主五兵涼風厲而參伐
明太白所以高上將時則有虎桓之士鷹獵之臣壯祈父
干爪牙鬱干城爲心膂者洎乎成功運四時之序易名當
大至之期丹青儼駐干雲臺弓劒虛存乎玉帳人懷廉恥
之將國亡詩禮之英詎止氣奪百夫哀騰七萃者哉惟公
世本雄豪家承武略六國之師盡靡則斧鉞西河八戰之
列畢張則旂常大漢乃復降乘辰尾潛感雷精嬉戲之餘
夙成部曲指麾之下卽畫山川五氣五聲久聞夫呂望九
天九地何屈乎孫卿奮湍狐父之戈沒石熊渠之矢投蓋
而千人盡辟據鞍則萬里非遙况乎隴右多奇關西出將

馬文淵之勃起壯士何多班定遠之喟然丈夫當爾于是
羽林擊劒樂府從軍激昂鼙鼓之求忼慨熊羆之寄遂使
波澄蒼兕海偃盧龍樓船清坐嘯之風赤角靜彈碁之晝
屬以慶霄涵物瑞露膏年侍子園橋裨王稽辯度遼都尉
無俟于威明出塞將軍不煩夫伯度然而刺泉疎勒常撫
髀干綸巾羽扇之前刻石祁連猶抵掌于投壺雅歌之際
旣乃唾孟竝缺手戟全拋雖充國壯謀曷云其老而鄧公
勁髮且復幡然將非楊僕之移關無羨廉頗之用趙于是
以握奇之術傳之後人以報

國之忠勗之令子江山秋整舊部重臨刁斗煙高餘風不
變陸抗則繼爲都督荀首則更佐中軍謝主簿之乘輅羊

南城之綏帶復以笑談禦侮樽俎折衝雄戟參星崇牙擻
斗蟠爲山岳壓鉅鎮千臨淮沈若江河儷雅詩于常武焱
榮事業晬曜勛名故知忠信所積何忌于道家之言股肱
是毗方復爲縉紳之盛矣湍易摧波離當昃日夫何美疢
忽值凋年尙思矍鑠干生平豈謂優游以怛化天星夜落
秋風蜀相之原岸谷朝頽暮雨彭侯之誠三軍盡縞淚濕
旌旆八陣空懸氣寒虬鳥蘭綺畫裂驚地戶之摧車金鎖
朝昏迴廬山而造塚某竊慚文吏伏在下風眇學鈴圖罕
覩戎旅言瞻壇旂等列王臣事未屬乎櫟韃教前聞乎節
制其深國恤均悼人亡瞻蹴踖之春營尙餘細柳引銘旌
千斷岸空寫長雲裁征南沈水之碑令名安盡述懷縣荆

州之誅盛德何多託北里而陳辭溯東州以寄奠所望豐
城夜氣從風雨以俱來楚水文犀邈川原而不隔尙饗

國朝駢體正宗卷二